

PHULLEN LAL AWKSARALA UPa KA HRIAT THEIH CHINTE

- Buata Bawihtlung

WhatsApp Phullen Group ah Pu Biakan Awksarala Upate hming pahnih sawiin, a dang lo thawh belh ru a ti a, tihian karawn phuah khawm ve ang e.

1. Neihruma - Khawchhiar
2. Hnundailova
3. Thangkhuma
4. Dareka
5. Zakhuma
6. Hrangphunga
7. Tuala
8. Dolala / Thavapa



Pu NEIHRUMA hi Pu Neihtawna pa a ni a, Kristian hmasa, Harhna chang hmasa a ni. Khandaih harhnaah intan tirh a Tuivai atanga khua a an haw kawngah khan tleirawlte niin Hla chang sawitu a ni a. An zai tui bawk a, hla pakhat te kha vawi 30 te an la nawn hial thin a ni. Khatih lai British India awpna hnuaiah khan Phullen ah Khawchhiar a ni. A fate pawh Kristian tha tak tak an ni zui a. A fapa Neihkhuma hi Phullen khua atanga Missionary chhuak hmasa ber a ni a, kum 1953 September ni 28 khan Missionary in a chhuak a ni. Tin, a fapa Pu Neihtawna pawh, Kohhran ngaipawimawh mi, Phullen Kohhran khuangpu hlun a ni bawk.

Pu HNUNDAILOVA hi Lal Awksarala khawnbawl upa a ni a. Kristian hmasa zing ami niin, kum 1920 khan Kohhran Upa atan nemngheh a ni. Pu Hnundailova hi Upa Zawmliana Phullen vengthar upa ni mek te, Pu Biakchunga (L) (Upa Lalramthara PWC Charman hlui pa) te pa a ni. Pathian thu awih hmasa, Kristian tha tak chhungkua an ni a. A tu leh fate zingah pawh Pathian leh a Kohhran tana mi tangkai tak tak, Pastor leh Kohhran Upa an awm nual a ni. Pu Hnundailova leh Pu Hrangphunga te hi Lal khawnbawl upa an nih bakah Kohhran Upa ni bawk an ni.

Pu DAREKA hi a hming dik tak nia an sawi chu Darthuama a ni a. Innbuan chak, thu leh hla lama tui mi, pi leh pute thawnthu inhlan chhawn hre tak leh Serh leh sang ngai pawimawh mi a ni a. A pa Thangzika pawh kha Khandaih lal Vanphunga khawnbawl upa te zing a mi a ni. Puma Zai hla leh kaihlek hla te pawh a phuah ve niin an sawi. Hmanlaia lo atana an neih ngam loh Sih huai leh Zawng lu ro awmna hmun te pawh a thian thiam a ngaih a ni a. Pu Darekan a then hnuah Lo atan a nei thin. Hnang deh a thiam hle bawh niin an sawi.

Pu ZAKHUMA hi Upa Tawnkima, Pu K Thanhira etc te pa a ni. Awksarala khawnbawl upa a ni a, Pu Zakhuma pa pawh kha Vanphunga Khawnbawl upa zing ami niin an sawi. Zakhuma hi kum 1914 a Awksarala hova Thirhluma kai zingah, Kristian tlemte tel zing a mi a ni. Heta an awm lai hian Kristian awmchhun te kha an pawimawh em em a. Hetah hian Biak In an sa ve a, Zawlbuk khuang kha Biak Inah an la lut a, hei hi Biak Ina khuang an lakluh hmasakna a nih hmel. Pu Zakhuma te hi mi tha chung an ni a, Khandaih harhna a a bultanna Hnunka Pawhte kha, mi harsa tak chungkua atanga lo piang a nih avangin an hnenah awmin an dawmkanga, an In atangin nupui a nei nghe nghe.

Pu HRANGPHUNGA hi Pu Tlanhnûna (L), Pi Tlanthangi (Pu K Lalthlengliana nu) te pa a ni. Tin, tuna VC member Pu J.Remsiana pu hi a ni. Awksarala khawnbawl upa, Kristian hmasa a ni a. Awksarala kianga Thirhlum kai Kristian tlemte zing ami a ni. Thirhlum kai lai hian, Kristiante kha Thirhlum ah kai ve lovin Khandaih lamah an awm deuh vek a ni. Kum 1921 khan Kohhran Upa atan nemngheh a ni. Thirhlumah hian rei tak an awm lo va, khaw thar a nih bakah Kristian tam zawk Khandaih lamah an awm si a, Kristian chu In thum vel chauh an awm a. Chawlhni te an theihngihl chang a awm thin a ni awm e. Mahse mak tak maiin harhna a rawn thleng a, Awksarala pawh he hmunah hian Kristianah a in pe a ni. Thirhluma an awm lai hian, tum khat chu Thli a tleh na hle a, Zawlbuk chung pawh a len bo daih a, a hnuah Tuivai kamah an hmu leh a ni.

Pu TUALA hi Khawnbawl upa a nih bakah, Pasaltha a ni a. A hming hi Tualduma tiin an sawi bawh thin. Pu Vankima (Pu Biaktea pa) leh Pu Lalenga (Pu Biakchungnunga Pu Lalrammawia PWC te pa) te pa a ni. Tum khat chu lalpa hoin an ramvak a, Pu Tuala chuan Sakhi a kap a. Chu Sakhi chu ramah chuan an pum rawh ta a. Sakhi an rawhna lai hmun chu Sakhi rawh kawn tih a ni zui ta a, tun thlengin Sakhirawhkawn hming hi a lo pu ta a ni.

Pu DOLALA hi Pu Thavapa pa a ni a. Pu Dolala a lo upat deuh hnu chuan, lal Awksarala chuan pu Dolala aiawh a roelna a tel turin Pu Thavapa hi a sawm thin a. Naupang te ni chungin a tel ve thin. Tum.khat chu Sailo lal leh Sailo lal an in dawr naah, Serzawl lal Lalsakeia dawr turin lal Awksarala khan a tir vang vang a ni. Lalnu Pi

Lalhliapi (Awksarala nupui) a thih khan, a fate chuan khawnbawl Upa damchhun tiin Pu Thavapa hi Phullena a awm chu Aizawlah an hruai thla nghe nghe. Pu Thavapa hi Pi Thaengi chhang chiah a ni a. A nupui Pi Thanliani nen khan an inruah khawp a; zankhata piang ve ve an ni.

A sei leh ta hle mai. Awksarala Khawnbawl upa dangte chanchin hi chu ka mi chhuan leh ngaihsan pahni Pu Biaka (Ex Chairman PWC) leh Pu Vanthuama (Teacher, Thangthar Historian hlu) te rawn chhunzawm ve atan ka khek e.

Ziah dik loh ka neih chuan, khawngaihin min lo ngaidam ula, a dik zawk min hrih dawn nia. Ka thulakna langsar zualte chu- Upa Khuangchhana, V.Vanthuampaia, Upa Dohmingthanga, Pu Thavapa chanchin (Vuina a mi), Pu K.Lalthlengliana, Pu L.Biakdanga etc

Buata Bawihlung

Ni 16.4.2017 Easter Sunday 1:10 PM @ Tkt

Edited on 17.4.2017 Monday 1:15 AM @ tkt